

## **Ilinniagaqarnermut akiitsunik taarsersuinermut tapiissuteqartarnek pillugu Inatsisartut inatsisaat nr. 24, 3. november 1994-imeersoq Atuussimasoq (Historisk)**

### *Ilinniagaqarnermut akiitsunik taarsersuinermut tapiissuteqartarnek.*

§ 1. Ilinniagaqarnermut Namminersornerullutik Oqartussanut akiitsut aamma ilinniagaqarnermut aningaaserivinnut akiitsut Namminersornerullutik Oqartussanit qularnaveeqqusikkat taarsersorneqarnissaannut Namminersornerullutik Oqartussat tapiissuteqartarput

- 1) ilinniagaqarnek naammassineqarsimagaangat imaluunniit kipitinneqarsimagaangat aamma
- 2) taarsigassarsiat aalajangersimasumik taarsigassarsiatut taarsigassarsiaritinneqaraangata imaluunniit taamatut taarsigassarsianngortinneqaraangata.

Imm. 2. Makkuninnga pissuteqartumik ilinniagaqarnermut akiitsorilersimasanut tapiissuteqartoqarsinnaangilaq:

- 1) tillinniarnernik aserorterinernillu
- 2) nerisanut ineqarnermullu akiliingitsoortarsimanermik imaluunniit
- 3) ilinniagaqarnermut tapiissutinik amerlanaarlugit kukkusumilluunniit tunniussisarsimanermik.

Imm. 3. Aningaasat pissutsit imm. 2-mi taaneqartut tunngavigalugit atorneqarsimasut nalingi tapiissutissat annertussusissaasa naatsorsonerini ilanngunneqarsinnaangillat. Aammattaaq ilinniagaqarnermut akiitsunik allanik peqarsimappat aningaasat taamatut atorneqarsimasut taarsersorsimanerisa nalingi tapiissutissat naatsorsonerini ilanngunneqarsinnaangillat.

§ 2. Inunnut Kalaallit Nunaanni najugaqavissunut tapiissuteqartoqartarpoq.

Imm. 2. Immikkut illuinnartunik pissutissaqartillugu inuit Kalaallit Nunaata avataani najugaqartut tapiissuteqarfigineqarsinnaapput, ilinniagaq naammassisimasaq imaaliallaannarluni Kalaallit Nunaanni suliffissaqaataalersinnaangippat imaluunniit ilinniagaqarnermut tapiissuteqartarnerup ingerlateqqinnissaanut peqatigitillugu ilinniagaqarnermut akiitsutoqqat taarsersorneqarnissaat piunasaqaataasimappat.

Imm. 3. Naalakkersuisut tamakku pillugit sukumiinerusumik maleruagassiorsinnaapput.

§ 3. Qaammatisiutit malillugit ukiup, tulliiini ukiumik akilersuiffimmik taaneqartartussap, ingerlanerani akiliutaasimasut tunngavigalugit tapiissuteqartoqartassaaq, apeqqutaatinnagu aningaasat akiitsunut taarsersuutitut imaluunniit ernianut akiliutitut akiliutaasimanersut.

Imm. 2. Tapiissutit tunniunneqartassapput ukiup akilersuiffiup tulliani 1. decemberimi, tak. imm. 1, 1) akiliutaasimasut katillutik, tak. imm. 1, minnerpaamik 6.000,- kruuniuppata aamma 2) tassunga peqatigitillugu akiliutaasimasut ukiup akilersuiffiup ingerlanerani ernialiusaasimasunit amerlaneruppata.

Imm. 3. Akiitsut amerlasoorujussuusimagaangata qaammammullu akiliutaasartut minnerpaamik 2.000 kruuniusimagaangata imm. 2, nr. 2-mi patsisissaatitaasoq

naatsorsuutigineqanngitsoorsinnaasassaaq.

Imm. 4. Tapiiffigineqarnissamik qinnuteqaatit ukiumi tapiissutisiffissami 1. september nallertinnagu nassiunneqareersimassapput.

**§ 4.** Tapiissutit aallaavittut ukiup akilersuiffiup ingerlanerani akiliutaasimasut nalinginik amerlassuseqartinneqartassapput.

Imm. 2. Akilersuisup sumi najugaqarnera kiisalu akiitsut annertussusii suunerilu apeqqutaatillugit tapiissutit qaffanneqartassapput, tamatumani aningaasat imm. 1 naapertorlugu naatsorsorneqarsimasut kisitsimmik naatsorsuineri tunngavissat ilaannik ilanngussaq 1-imiittumik amerlisarneqartassapput.

Imm. 3. Imm. 2-mi illoqarfinnik nunaqarfinnillu/isorliunerusunillu agguataarineri Kalaallit Nunaanni tjenestemandinik agguataarineq qanoq ilisukkulluunniit atuuttoq malinneqartassaaq.

Imm. 4. Akiitsut annertussusii, tak. imm. 2, tassaapput ukiumi akilersuiffimmi decembarip 31-anni akiitsut annertussusii. Tapiissutit ukiup akilersuiffiup aappaaguani 1. december ilanngunneqartussat akiitsut naatsorsornerini ilaatinneqassanngillat. Akiitsut annertussusii tassaapput akiitsut tapiissutisiaqaataasinnaasut tamakkerlutik katinnerisa nalingi, tak. § 1.

Imm. 5. Akiitsunik assigiinngiaartunik ilanngussaq 1-imi taagorneqartunik akiitsoqartoqartillugu taakkua immikkoortui ataasiakkarlugit tapiissuteqarfigineqartassapput.

**§ 5.** Ukiumi akilersuiffimmi aningaasarsiat akileraaruteqaataasussat Namminersornerullutik Oqartussani kommuniniluunniit tjenestemandip skalatrin 30-miittup ukiumi akilersuiffimmi, tak. § 3, imm. 1, 30. oktober akissarsiaanit ilanngaataqariinngitsunit 1.000 kruuninik amerlaneroriarneri tamaasa § 4 naapertorlugu tapiissutit 0,5 %-imik ilanngarneqartassapput. Naatsorsuisoqalersinnagu akissarsiat ilanngaataqariinngitsut aningaasanut 5.000-inik agguarneqarsinnaasunut qaninnernut akunnaallineqassapput.

**§ 6.** Akiitsut sorliit, tak. § 4, imm. 5, tapiissutisiaqarnermut pissutaanerit apeqqutaatinnagu pingaarnerutillugu Namminersornerullutik Oqartussanut akiitsut akilersornissaannut tapiissuteqartoqartassaaq.

**§ 7.** Ukiumi tapiissutisiffiusumi 1. decemberimi akiitsut tamarmiusut sinnerlugit tapiissuteqartoqarsinnaanngilaq.

Ilinniagaqarnermi akiitsunik isumakkeerinnineq.

**§ 8.** Aningaasanik atorsimasoq immikkut ajornartorsiorsimappat ilinniagaqarnermut akiitsunik taarsersuineri tapiissuteqartarnermi piumasaqaataasut naammassisimannngikkaluarpagilluunniit qinnuteqarnera naapertorlugu Naalakkersuisut aningaasanut inatsimmi aningaasat amerlassusileriikkat iluanni ilinniagaqarnermut akiitsut tamakkerlugit ilaannaalluunniit isumakkeersinnaavaat.

Imm. 2. Ilinniagaqarnermut akiitsulik toquppat imaluunniit tamakkiisumik innarluuteqalerpataamaalillunilu akiliisinnaajunnaavilluni akiitsui pinngitsoorani isumakkeerneqassapput.

Imm. 3. Aningaasanik atorsimasup ilinniagaqarnermut akiitsuisa qanoq ilineratigut imm. 1 aamma 2 naapertorlugit isumakkeerneqartarnissaat pillugu Naalakkersuisut sukumiinerusumik

malittarisassaliussapput.

*Paasissutissiisussaataaneq.*

**§ 9.** Qinnuteqartut paasissutissat tapiissutissat naatsorsorneqarnerini pisariaqartut tamaasa saqqummiuttassavaat.

Imm. 2. Qinnuteqartoq paasissutissanik eqqunngitsunik amigartunilluunniit saqqummiussisimappat piumasaaqatigineqarsinnaavoq tapiissutit eqqunngitsunik tunniunneqarsimasut erniaat ilanngullugit utertinneqassasut. Erniat qanoq angissusiligaanissaat il.il. pillugit Naalackersuisut malittarisassaliussapput.

*Qinnuteqarnermi periusissat.*

**§ 10.** Naalackersuisut qinnuteqarnermi periusissat taamaaqataallu pillugit malittarisassaliorsinnaapput.

Imm. 2. Naalackersuisut immikkut ittunik pisoqartillugu aalajangersinnaavaat ilinniagaqarnermi akiitsut Namminersornerullutik Oqartussanit atukkat taakkunangaluunniit qularnaveeqqusikkat atortitsinissamik neriorsuuteqarnermi qularnaveeqqusiinermiluunniit utertitsilluni akilersornissaannut piffissarititaasumit kingusinnerusukkat akilerneqarsinnaasut.

*Naammagittaalliorsinnaaneq atulerfissaalu.*

**§ 11.** Inatsit taannaluunniit malillugu malittarisassat naapertorlugit aalajangiineq pillugu naammagittaalliuut aalajangiinerup tiguneraniit sapaatit akunneri sisamat qaangiutsinnagit ilinniagaqarnerisuteqartitsinermi Naammagittaalliteqartarfimmut suliassanngortinneqarsinnaavoq. Inatsit taannaluunniit malillugu malittarisassat naapertorlugit aalajangiineq tamatigut tamanna pillugu paasissutissamik ilaqartinneqassaaq.

**§ 12.** Inatsit una ukiumit akilersuiffimmit 1994-imit atuuttussanngorlugu 1. januar 1995 atortuulersinneqarpoq.

Imm. 2. Ilinniagaqarnermut akiitsunut oqilisaassivigineqartarnek pillugu Inatsisartut inatsisaat nr. 15 ulloq 23. november 1989-imeersoq kingusinnerusukkat allannguutilik atortuujunnaarsinneqarpoq.

Imm. 3. Inatsit imrn. 2-mi taaneqartoq naapertorlugu allaffeqarfikkut aalajangersakkat atortuinnassapput inatsit una naapertorlugu aalajangersakkat naapertorlugit allanngortinneqarnissamik atorunnaarsinneqarnissamilluunniit tungaanut.

*Namminersornerullutik Oqartussat, ulloq 3. november 1994*

Lars Emil Johansen

/

Emil Abelsen

---

Ilanngussaq